



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁL

Komunikadu Imprensa

6 Marsu 2014

Komunidade Suku Karau Balo husu kona-ba implementasaun Lei Protesaun Testemuña

Iha 25 Feveireiru 2014, *Judicial System Monitoring Programme* (JSMP) liuhusi Unidade Peskizador Legál (LRU) no Unidade Projeitu Observasaun Parlamentár (POP) realiza treinamentu kona-ba *Asesu ba Justisa Formal* ba komunidade sira iha Suku Karau Balo, Distritu Viqueque.

Partisipante sira ne'ebé partisipa iha treinamentu ne'e mai husi estrutura suku inklui xefe suku, xefe aldeia, lia-nain, joventude feto no mane. Totál partisipante sira hamutuk nain 30 no kompostu husi mane nain 20 no feto nain 10.

Materia treinamentu ne'e kontinua subliña kona-ba direitu ema nian, kna'ar juis, prokurador, advogadu privadu no defensor públiku, klasifikasaun kazu krime sira no oinsa komunidade sira prosesa kazu krime sira tuir sistema justisa formal.

Durante sesaun treinamentu komunidade sira husu kona-ba ezistencia Lei ba Protesaun Testemuña no oinsa nia implementasaun. Aleinde ne'e sira preokupa no konfundi kona-ba atetude amante (*perzinahan*) ne'ebé la tama ba kategoria krime tanba kazu hanesan ne'e dala barak akontese iha sira nia suku hodi hamoe no hafoer naran familia no suku.

Iha parte seluk sira preokupa mós ba aplikasaun Lei Kontra Víolénsia Doméstika sai krime públiku tanba sira haree ba nia vantajen no dezvantajen ne'ebé ladun refleita ho kultura Timor. Aleinde ne'e preokupa kona-ba kazu krime sira ne'e, sira mos preokupa kona-ba diferente entre meru detentor (*hak pakai*) no direitu *propriedade* (*hak milik*) ba rai. Nune'e mós hanesan treinamentu iha distritu sira seluk, partisipantes sira, preokupa kona-ba atendentu entre ema boot no kiik.

“JSMP hanoin ne'e realidade ne'ebé estadu tenke buka nia solusaun atraves husi instituisaun relaventes atu tun ba iha baze hodi klarifika konfuzsaun hirak ne'e. JSMP hanoin katak governu iha obrigasaun atu hatan ba konfuzsaun hirak ne'e, no asegura katak komunidade hetan informasaun ne'ebé loos,” dehan Diretór Ezekutivu JSMP, Luis Olivera Sampaio.

Durante treinamentu, JSMP hatan duvidas no preokupasaun hirak ne'ebé partisipantes sira hatu'o atu nune'é sira mós bele iha koñesimentu kona-ba lala'ok justisa iha Timor Leste. Liu-liu relaciona ho sira nia preokupasun kona-ba prezensa Lei Kontra Violénsia Doméstika, fasilitador sira esplika katak lei ne'e nia objetivu proteze vítima sira no atu promove prevensaun atu hadokan husi violénsia iha uma laran. Lei ne'e tula responsabilidade ba instituisaun hot-hotu atu promove justisa no igualidade iha familia.

Iha abertura ba treinamentu ne'e, Xefe Suku Karau Balo, Sr. Teodoro Osorio Pinto espresa nia sentimentu haksolok tanba prezensa JSMP nian iha nia suku, liu-liu tanba fahe asuntu importante kona-ba sistema justisa formal hirak ne'e ba nia comunidade iha nia suku laran.

Atividade treinamentu ne'e realiza tanbá hetan suporta fundu husi Embaixada **Canada iha Jakarta –Indonezia.**

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl